

ՓԻԼՍՊՈՎՈՍ ԿԱՓՈՂԻԿՈՍ. — ՌՃԲ = 1654, ԱՊՐԻԼ, 15.

Ձի եկև Նիկոյ առ ինքն ի հնազանդութիւն. և պատուիրէ ընդունել զնա):

Է՛



Ի ՍՈՒՍԻ Քրիստոսի ծառայ Փիլիպպոս կաթողիկոս ամենայն Հայոց և պատրիարք Վաղարշապատու լուսակառոյց և քրիստոսամատոյց յեհափառև հրեշտակապար սրբոյ աթոռոյ Էլմիածնի Յորմէ ժամանեալ Հասցէ գիր արհնութեան և նամակ պահպանութեան. շնորհք առաքելական և աստուածային օրհնութիւն ի վերայ տեառնապահ և քրիստոսախնամ մայրաքաղաքիդ Իլովայ, Ս. Լուսաւորչ իհարազատ որդւոց հայազուն ազանց մերոյ. մեղսաքաւիչ քահանայից, հանճարաշատ երեսփոխանաց, խորհրդաթիւ դատաւորաց, արգասապատիւ տօլվաթաւորաց, և առհասարակ ժողովրդոց, արանց և կանանց, ծերոց և տղայոց, երիտասարդաց և կուսից, և ամենայն չափու հասակի հաւատացելոց ի Տէր, մեծամեծաց և փոքունց, միանգամայն ամենեցուն. ամէն. Շնորհք ընդ ձեզ և խաղաղութիւն յԱստուծոյ Հօրէ մերմէ և ի Տեառնէ Յիսուսէ Քրիստոսէ, և ի Հոգւոյն Սրբոյ կենարարէ և յառատածիր բարերարէ, և յամենազօր մարդասիրէ և ամէնունակ բաշխողէ. ամէն: Աւրհնեացէ զձեզ Տէր Աստուած և նախախնամեալ պահեսցէ անխռով և անասան կենօք. և զարդարեսցէ հոգւով և մարմնով, տամբք և տեղօք, զարմօք և զաւակօք, որդւովք և դստերօք, սիրելեօք և բարեկամօք, ընչիւք և ապրանօք, այգեստանօք և բուրաստանօք, հոգեկանօք և մարմնականօք. և փրկկեսցէ յամենայն փորձանաց՝ յերեւելեաց և յաներեւութից, մարդադէմ գազանաց, ի քարասիրտ բռնաւորաց. ամէն:

Ընդ սիրոյ արհնութեանս յուշ լիցի վերոյգրեալ սիրելեացդ մերոց. զի ահա այսքան տարի այդքան նեղութիւն և վիշտ որ ձեզ պատահեցաւ, թէ ի սատանայէ էր թէ ի շար մարդկանէ և թէ վասն մեղաց. այդքան նեղութիւն կրեցիք և որքան ջանացիք՝ ուստեք ելս իրաց ոչ գտէք. ոչ ի թաղաւորաց, ոչ յիշխանաց, ոչ ի մէնջ, և ոչ այլ ուստեք: Ահա ի գթութենէն Աստուծոյ ելեալ դիմեաց առ մեզ Նիկողայոս արքեպիսկոպոսն բազում խոնարհութեամբ, և եցոյց մեզ զկատարեալ հնազանդութիւնն իւր. և մեք վասն օգտի ձերոյ և խաղաղութեան՝ ընկալաք բազում սիրով և յոյժ մեծարանօք, որպէս վա-